

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 4/2022-imi Inatsisartut ilaliinissaannik siunnersuut:

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut nunani avannarlerni killerni naligiissitaanissamut naalakkersuisut 2023-mi ataatsimeeqatigiissinneqarnissaat kaammattuutigaa. Tamatuma siunertarineqassaaq nunani avannarlerni killerni naligiissitaanermut naalakkersuisut Naligiissitaaneq eqqarsaatigalugit 2019-imiit 2022-mut nunani avannarlerni suleqatigiinnissamut pilersaarut, Nunani avannarlerni LGBTI-t naligiimmik pisinnaatitaaffeqarnerat, pineqartussaanerat periarfissaqartinneqarnissaallu pillugit tapertalerlugu 31. december 2024-ip tungaanut ingerlaqqittussatut nunani avannarlerni naligiissitaanermut ministerit 6. september 2011-mi aalajangiffigisaat, eqqarsaatigalugu misilittakkanik paarlaasseqatigiinnissaat. Taamatuttaaq kaammattuutigineqarpoq nunani avannarlerni killerni naligiissitaanermut naalakkersuisut naligiissitaaneq eqqarsaatigalugu nunani avannarlerni killerni ajornartorsiutit suussusersiniassagaat taakkulu eqqarsaatigalugit suliniutit ataqatigiittut eqqartorlugit. Ilanngullugu kaammattuutigineqarpit arnat angutillu naaligiissitaanissaat eqqarsaatigalugit Naalagaaffiit Peqatigiit nunarsuarmioqatigiinnut anguniagassiaat nunat avannarliit killiit naligiissitaanermut naalakkersuisut suleqatigiinnerminni innersuussutigissagaat.

(Aallartitat siulittaasuat Kim Kielsen)

Akissuteqaat

(Aningaasaqarnermut Naligiissitaanermullu Naalakkersuisoq)

Siullermeerinnineq

Naalakkersuisut sinnerlugit nunat avannarliit killiit naligiissitaanermut ministeriisa misilittakkanik avitseqatigiinnissaq siunertaralugu, 2023-mi ataatsimiinnissaannik Nunat Avannarliit Killiit kaammattuutaannik Inatsisartut ilaliinissaannut siunnersuut qujassutigaa. Kaammattuummi nunat avannarliit naligiissitaanermut suleqatigiinnissamut pilersaarutaannik siorna atorunnaartumik, misilittakkanik immikkut avitseqatigiinnissaq siunniunneqarpoq.

Nunat Avannarliit Killiit naligiissitaanermik naligiissitaanermullu ilungersornartut inuiaqatigiinni tamani piusut iliuuseqarfiginissaannik kissaataat Naalakkersuisut isumaqatigaat. Piffissami arnat aamma inuit LGBTI-mik tunuliaqutillit pisinnaatitaaffiisa nunarsuaq tamakkerlugu unioqqutinneqarlutillu akerlilersorneqarneranni inuuvugut. LGBTI tuluit oqaasiinik lesbian, gay, bisexual, trans interseximillu naalisagaavoq. Nammineq nunatsinni naligiissitaanermik sorsuutiginninnerit suli amerlasuut iliuuseqarfigineqartussaapput. Isumaginninnermut immikkoortumi, peqqinnissamut immikkoortumi, ilinniartitaanermut immikkoortumi, suliffeqarnermi il.il. unammilligassat

amerlasuut suaassutsimut attuumassuteqartuunerannik paasinnillu arnerulertariaqarpugut. Suliffeqarneq qangaaniilli suaassutsikkut aggulunneqartoq, sulisinnaasunillu pitsaannerusumik atuisinnaanermik akerlilersuisumik unammilligassat tikkuarsinnaavagut. Persuttaanerit, kinguaassiutitigit atonerluinerit imminnullu toquttarnerit malitsigisaannik kingunerluutit pilersaarnerat inooqataaffigaagut. Ajornartorsiutit taakku suaassutsikkut erseqqissumik attuumassuteqarpugut. Tamanna aamma ilinniartitaanermut immikkoortumi nukappiaqqat ikippallaat ilinniakkaminnik naammassinnittarnerisigut takusinnaavarput. Inuiaqatigiittut siunnerfigissaannerusumik aqqissuussaannerusumillu naligiissitaanermik suaassutsinillu sulinikkut angusassarpassuaqarpugut. Taamaammat naalackersuisut naligiissitaanermut immikkoortitsinnginnissamillu inatsit nutaaq ukiaru saqqummiutissavaat, peqatigisaanillu suliffeqarnermik suaassutsikkut aggulussimasumik akiuinissaq siunnerfilimmik suliniuteqarfigineqassaaq.

Kinaluunniit suaassutsini patsisigalugu aporfilerneqassanngitsoq Naalackersuisut anguniagaraat. Kikkut tamarmik ineriartornissaminnut assigiimmik periarfissaqarnissaat qulakkeerneqassaaq. Taamatullu suliniarnermi nunat allat, ingammillu nunat aqqissuussaannermikkut nunatsinnut assigiissutillit suleqatiginissaat pissusissamisoorpoq.

Taamaammat 2023-mi ukiaanerani nunani avannarlerni naligiissitaanermut ministerit ataatsimeeqatigineqarnissaat pilersaarutaavoq, ataatsimiinnermilu tassani Nunat Avannarliit Killiit Siunnersuisooqatigiivisa kaammattuutaata imarisaa oqallisigisassanut ilaassaaq.

Taamaalillutik Naalackersuisut kaammattuut ilalerpaat, peqatigisaanilli siunnersuut assingusooq Inatsisartunut aalajangiiffigisassanngorlugu siusinnerusukkat saqqummiunneqarnissaa kissaatigineqarpoq, taamaaliornikkut nunat akimorlugit pilersaarusiornermut pisariaqartumik piffissaliinissaq pisinnaaqqullugu.

Taama oqaaseqarluta oqallilluarnissassinnik kissaappassi.